

Kajian ini meneroka pengalaman trauma masa kecil dan kesannya terhadap kecenderungan dalam penglibatan aktiviti jenayah dalam kalangan pelajar Sekolah Tunas Bakti Sungai Besi. Persoalan utama kajian ini ialah bagaimana trauma pada zaman kanak-kanak mempengaruhi tingkah laku remaja sehingga terlibat dalam aktiviti jenayah. Kajian ini juga meneliti faktor-faktor lain seperti pengaruh sosial, persekitaran keluarga, serta mekanisme psikologi yang menjadi perantara kepada tingkah laku antisosial. Tujuan utama kajian ini adalah untuk memahami secara mendalam hubungan antara pengalaman trauma dan pembentukan kecenderungan terhadap jenayah. Lokasi kajian bertumpu O. Sekolah Tunas Bakti Sungai Besi, sebuah institusi pemulihan kendalian Jabatan Kebajikan Masyarakat, yang menempatkan remaja lelaki: berumur 15 hingga tahun. Kajian menggunakan pendekatan kualitatif dengan kaedah fenomenologi, di mana data dikumpul melalui temu bual secara mendalam dan dianalisis menggunakan analisis tematik. Dapatan kajian menunjukkan bahawa pengalaman penderaan fizikal, emosi, pengabaian, dan kehilangan kasih sayang semasa kecil memberi kesan psikologi yang mendalam, termasuk gangguan emosi, ketidakupayaan membina hubungan sihat, dan kecenderungan untuk bertindak agresif. Kajian ini turut menemui lima tema utama: pengalaman trauma, faktor penyumbang kepada penglibatan jenayah, naratif peribadi, mekanisme psikologi, dan harapan diri. Penemuan ini menyumbang kepada bidang psikologi perkembangan dan kriminologi dengan memperkukuh kefahaman tentang bagaimana faktor psikososial awal membentuk corak tingkah laku antisosial. Dari segi dasar, kajian ini mencadangkan pentingnya intervensi awal, program pemulihan berfokus psikologi, serta dasar perlindungan kanak-kanak yang lebih menyeluruh untuk mengurangkan risiko penglibatan jenayah dalam kalangan remaja yang mengalami trauma. Kajian ini juga menyarankan agar pihak berkepentingan seperti Sekolah Tunas Bakti, kaunselor, dan pembuat dasar menyesuaikan pendekatan sokongan dan rawatan bagi memastikan proses pemulihan yang lebih efektif dan holistic,